

jejak graduan

Bashir jadi 'gogo'
miliki cabaran
tersendiri

BERITA HARIAN (VARSITI) 23 FEB 2017 M/S 12

profil

Bashir Shahrum

→ **Tarikh Lahir:** 20 September 1990
 → **Tempat Lahir:** Klang
 → **Pendidikan:** Sekolah Rendah Islam Al Farabi, Klang; Sekolah Agama Menengah Bestari, USJ5, Subang Jaya dan Diploma Kejuruteraan Awam UMP
 → **Hobi:** Mendaki gunung, 'rock climbing', 'wall climbing', menjelajah di dalam dan luar negara dan perkhemahan

Oleh Faizatul Farhana Farush Khan
 ffarhana@bh.com.my

Kuala Lumpur

Minat yang mendalam dalam aktiviti pendakian gunung membuatkan Bashir Shahrum, 27, melupakan kerjaya 'makan gaji' biarpun memiliki kelulusan daripada universiti awam, sebaliknya beliau memilih menjadi penganjur pengembaraan kepada pencinta aktiviti mencabar itu.

Graduan Universiti Malaysia Pahang (UMP) itu, berkata bagaimanapun beliau tetap mengaplikasikan ilmu diperoleh ketika pengajian bagi mengendalikan tugas sebagai penganjur pengembaraan seperti kemahiran komunikasi bersama peserta program yang diadakan.

Beliau berkata, penganjur pengembaraan atau lebih dikenali dengan sebutan 'gogo' dalam kalangan

penggiat aktiviti itu, berperanan menguruskan segala keperluan sesuatu pendakian, bermula daripada pengumpulan peserta sehingga mereka selamat menamatkan misi.

"Sebagai gogo, saya perlu menguruskan dengan baik setiap misi pendakian, seperti membuat pengiraan bajet peserta, menentukan kos makanan, menyusun tentatif aktiviti sepanjang tempoh pendakian, merancang pengangkutan serta menentukan lokasi permulaan.

"Bisnis ini saya jalankan bersama beberapa rakan rapat yang turut memiliki pengalaman tersendiri serta minat mendalam terhadap aktiviti pendakian. Kami menghadkan jumlah peserta setiap kali perjalanan bagi memastikan kelancaran pendakian dan keselamatan mereka.

"Lebih menyenangkan peserta, kami akan memberi peluang kepada mereka memberikan pendapat sebelum penga-



Bashir gemar aktiviti mencabar.

info

Trivia

→ **Mengendalikan** tugas sebagai penganjur pengembaraan bersama tiga rakan, Muhammad Hanafi Abu Nazir, Muhamad Syafiq Abd Rauf dan Hafifi Hanif Mohd Sharif
 → **Bashir** sudah mendaki puluhan gunung di dalam dan luar negara, termasuk di Indonesia, iaitu Gunung Rinjani, Gunung Kerinci, Gunung Papandayan dan Gunung Raung.
 → **Kumpulan** itu menghadkan jumlah peserta seramai 15 orang bagi setiap pendakian demi kelancaran dan keselamatan

turan tentatif ditetapkan, selain menyelitkan acara kerohanian atau usrah. Pakej harga kami kenakan juga cukup berpatutan kerana apa yang penting, keseronokan yang dilalui setiap peserta pendakian," katanya.

Tingkat pengetahuan

Ditanya cabaran ditempuhi sebagai penganjur pengembaraan, Bashir berkata, tugas itu menuntut kekuatan mental dan fizikal untuk mengendalikan kerenah atau masalah peserta, selain memerlukannya sentiasa meningkatkan pengetahuan serta pengalaman diri berhubung informasi sesuatu lokasi sasaran.

Katanya, sebelum menganjurkan aktiviti ke sesuatu lokasi baharu, beliau akan meningkatkan pengetahuan sedia ada mengenai tempat terbabit melalui pembacaan dan bertanya pada rakan-rakan yang lebih berpengalaman.

Bashir berkata, sebelum

perjalanan diatur, beliau akan 'menyelidik' latar belakang setiap peserta bagi mengetahui tahap kebiasaan mereka menyertai aktiviti pendakian dan aspek kesihatan, bertujuan memastikan perjalanan berjalan lancar serta memberi kepuasan kepada semua.

Diminta berkongsi tarikan aktiviti pendakian, katanya, selain memberikan cabaran tersendiri, menguji ketahanan mental dan kekuatan fizikal, aktiviti itu memberi peluang kepada individu untuk menjejakkan kaki ke suatu destinasi serta melihat keindahan alam ciptaan Allah SWT.

"Aktiviti ini bukan sahaja cukup baik untuk kesihatan tubuh badan dan meluaskan pengalaman saya, tetapi memenuhi minat mendalam saya terhadap aktiviti lasak," katanya yang menjadi penganjur pengembaraan untuk perjalanan di dalam dan luar negara.



Bashir (berdiri, dua dari kiri) bersama peserta pendakian.



Bashir (kanan) ketika menerima skrol diploma pada Majlis Konvokesyen UMP.